

Morning Dogri (NSD) National News Bulletin 12-08-2024

आकाशवाणी

- पैरिस ओलंपिक्स 2024 दा भव्य समारोह कन्नै समापन होआ, भारत नै 71मीं थाहर हासल कीती।
- प्रधानमंत्री नरेन्द्र मोदी होरें आखेआ जे पैरिस ओलंपिक्स च सब्बने एथलीटें अपना सर्वश्रेष्ठ प्रदर्शन कीता ऐ ते हर भारतीय गी उंदे पर मान ऐ।
- सैबी नै निवेशकें गी हिंडनबर्ग जनेही रिपोर्टें पर प्रतिक्रिया देने थमां पैहले संयम बरतने दी सलाह दित्ती। अडानी समूह सैबी अध्यक्ष ते उद्योगजगत दे प्रमुखें अमरीकी शोध कंपनी दी रिपोर्ट दी आलोचना कीती।
- औंदे विधान सभा चुनाएं दी तैआरिएं दी समीक्षा करने लेई भारतीय चुनां आयोग अज्जै थमां हरियाणा दे दऊं दिनें दे दौरे पर होग।
- राजस्थान च भारी बरखें कारण होए दे हादसें च तकरीबन 22 लोकें दी जान चली गई, अज्ज 7एं जिलें दे सब्बै स्कूल बंद।
- पैहली वैश्विक महिला कौड्डी लीग दी शुरूआत अगले म्हीने हरियाणा च होग।

<><><><><><>

Paris Olympics

पैरिस ओलंपिक्स 2024 दा समापन समारोह स्टेट डी फ्रांस च लग्गा जेहदे च केइएं दर्शकें हिस्सा लैता ते एथलीटें दी कामयाबी दा जश्न मनाया गेआ। भारत नै कुल 6 तगमे जित्ते जिंदे च 1 चांदी दा ते 5 कैह दे तगमे शामिल न। एहदे कन्नै भारत अंक तालिका च 71मीं थाहर पर रेहा। जिसलै के पिछली बारी टोक्यो ओलंपिक्स 2020 च भारत नै 48मीं थाहर हासल कीती ही। जित्थें भारत नै कुल 7 तगमें जित्ते हे जिंदे च 1 सुन्ने दा, 2 चांदी दे ते 4 कैह दे तगमे शामिल हे। इस बारी अंकतालिका च पैहली थाहर पर अमरीका ऐ जिन्ने कुल 126 ओलंपिक तगमे अपने नां कीते न, जिंदे च 40 सुन्ने दे बी शामिल न। चीन नै बी 40 सुन्ने दे तगमे सनें 91में तगमे जित्तिथै दूई थाहर हासल कीती ऐ।

इआं गै जापान 20 सुन्ने दे तगमे सनें कुल 45 तगमे जित्तिथै त्रीह थाहर पर रेहा।
आस्ट्रेलिया नै 18 सुन्ने दे तगमे सनें कुल 53 तगमे जित्तिथै चौथी थाहर हासल कीती ऐ।

<><><><><><>

PM-Paris Olympics

प्रधानमंत्री नरेन्द्र मोदी होरें आखेआ जे पैरिस ओलंपिक्स च सब्बने खडारिएं अपना सर्वश्रेष्ठ प्रदर्शन कीता ऐ ते सब्बने भारतीयें गी हुंदे पर मान ऐ। प्रधानमंत्री होरें सोशल मीडिया पर इक पोस्ट च खडारिएं दे जतनें दी प्रशंसा कीती ते भविष्य च सफलता दी कामना बी कीती। पैरिस ओलंपिक्स च भारत नै 71मीं थाहर हासल कीती ऐ जेह्दे च 1 चांदी दा ते 5 कैह् दे तगमे जित्ते न। इस बारी भारत दी तरफा कुल 117 भारतीय एथलीटें 16 खेड्डें च हिस्सा लैता हा।

<><><><><><>

PM-MKB

प्रधानमंत्री नरेन्द्र मोदी होर इस म्हीने दी 25 तरीक गी आकाशवाणी पर अपने मन की बात कार्यक्रम राएं देश विदेश च रौहने आले लोकें कन्नै अपने बचार सांझा करगंन। माहवार रेडियो कार्यक्रम दी एह 113मीं किश्त होग। लोक अपने सुझाह टोल फ्री नंबर 1800-11-7800 राएं भेजी सकदे न। ओह अपने बचार नरेन्द्र मोदी ऐप जां फही My Gov open Forum राएं बी भेजी सकदे न। इस कार्यक्रम लेई सुझाह भेजने दी खीरी तरीक 23 अगस्त तगर ऐ। मन की बात कार्यक्रम आकाशवाणी ते दूरदर्शन दे समूलचे नेटवर्क दे कन्नो कन्नी ए.आई.आर न्यूज वैबसाइट ते न्यूज ऑन एयर मोबाइल ऐप पर बी प्रसारत कीता जाग। कार्यक्रम दा एयर न्यूज, डी.डी.न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर लाईव प्रसारण होग। हिंदी प्रसारण दे तुरत परैंत इस कार्यक्रम दा इलाकाई भाषाएं च प्रसारण कीता जाग।

<><><><><><>

PM-Farmers

प्रधानमंत्री नरेंद्र मोदी होरें कल नमीं दिल्ली दे भारतीय कृषि अनुसंधान संस्थान च मती पैदावार देने आहिलयां जलवायु अनुकूल ते मते पोषक तत्वे कन्नै भरोची दियें फसलें दियें 109 किस्में गी जारी कीता। एह किस्मां 61 फसलें दियां न जिंदे च राई—बाई दियां 34 ते बागवानी दियां 27 फसलां शामिल न। राईबाई कन्नै जुड़ी दियें फसलें च बाजरा, तिल, दालां, गन्ना, कपास ते होर दुइयें फसलें दे बीं शामिल न। बागवानी फसलें च फल, सब्जी, मसाले, फूल ते दोआइयें आहलें पौधे दे बीएं सनें होर पोषक फसलें दी किस्मै गी बी जारी कीता गेआ। इस मौके प्रधानमंत्री नरेंद्र मोदी होरें करसानें ते साइंसदानें कन्नै गल्लकत्थ बी कीती।

<><><><><><>

Sebi

सैबी नै निवेशकें गी हिंडनबर्ग जनेह निराधार ते भ्रामक रिपोर्ट पर कोई प्रतिक्रिया जाह्र नेई करने दी सलाह दित्ती ऐ। शेयर बजार नियामक सैबी नै इक ब्यानै च अमरीकी शोध ते निवेश कंपनी हिंडनबर्ग रिसर्च दे आरोपें गी खारज करी दित्ता। भारतीय प्रतिभूति ते विनियम बोर्ड—सैबी नै हिंडनबर्ग रिसर्च दे आरोपें दा खंडन कीता ऐ। सैबी नै आखेआ ऐ जे ओहदे कश हितें दे टकराव कन्नै सरबंधी मुद्दे दे हल आस्तै लोड़चदे आंतरिक सरिस्ते हैन, जेहदे च तथ्यें गी दस्सने ते चीजें बारे जानकारी सरबंधी ढांचा ते अस्वीकृति दा प्रावधान शामिल ऐ। एहदे च एह बी आखेआ गेआ ऐ जे प्रतिभूतिएं दी सुरक्षा ते उंदे हस्तांतरण दे सरबंधै च लोड़चदे प्रासंगिक खुलासे समें—समें पर कीते गे न। एहदे च इस गल्ला पर बी लोह पाई गई ऐ जे अध्यक्ष नै हितें दे संभावित टकराव कन्नै जुड़े दे मामलें च अपने आपा गी बक्ख बी करी लैता। सैबी नै हिंडनबर्ग रिसर्च रिपोर्ट च कीते गेदे दावें पर आखेआ जे एह मुद्दे सेई ते लोड़चदी प्रतिक्रिया दी मंग करदे न।

<><><><><><>

ECI Haryana

भारतीय चुनाव आयोग दी टीम हरियाणा च होने आले विधानसभा चुनाव दी तैआरिण दी समीक्षा करने लेई अज्जै थमां दऊं दिनें दे दौरे पर होग। मुख्य चुनाव अधिकारी राजीव कुमार चुनाव अधिकारी ज्ञानेश कुमार ते सुखबीर सिंह संधु सनें आयोग दे होरने अधिकारी बी मजदूर रौहगन ते इस दरान केई बैठकां बी लाइयां जांगन।

हरियाणा दे मुख्य चुनां अधिकारी पंकज अग्रवाल होरें आखेआ जे आयोग अज्ज बैठक च चुनां दी तैआरिएं दा जायजा लैग जेह्दे च राजनीतिक पार्टिएं दे नुमायंदे, जिला चुनां अधिकारी ते होरने वरिष्ठ अफसर बी शामिल होंगन। उनें आखेआ जे कल आयोग मुत्तलका अजेंसिएं गी निगरानी ते तक्क बनाई रखने दे निर्देश देग। एह्दे इलावा चुनां आयोग इस दरान मुख्य सचिव, पुलस महानिदेशक ते होरने प्रशासन सचिवें ते वरिष्ठ पुलस अधिकारिएं कन्ने बैठकां लांगन तां जे होरनी तैआरिएं दा जायजा लैता जाई सकै।

<><><><><><>

Rajasthan Rains

राजस्थान च लगातार होआरदी भारी बरखा कारण होए दे हादसें च तकरीबन 22 लोकें अपनी जान मुहाई दित्ती ऐ। एह बरखा शनिवारें दी गै होआरदियां न। जेह्दे चलदे कल जयपुर, करौली, स्वाई माधोपुर ते दौसा दे केइएं शिड़कें पर पानी किट्ठा होई गेआ। प्रशासन नै जयपुर, जयपुर दे ग्रामीण इलाकें, दौसा, करौली, स्वाई माधोपुर, गंगापुर ते भारतपुर जिले दे सब्बने सरकारी ते प्राईवेट स्कूलें गी बंद रखने दा ऐलान कीता ऐ। मुख्यमंत्री भजन लाल शर्मा होरें स्थिति दा जायजा लैने लेई वरिष्ठ अधिकारिएं कन्ने बैठक कीती। मुख्यमंत्री होरें प्रभावत इलाकें च राहत कम्में च तेजी आनने लेई ते औंदे दिनें च मौसम दे हाल मताबक जरूरी गैह पुट्टने दे निर्देश दित्ते न।

<><><><><><>

IMD

भारतीय मौसम विभाग नै पूर्वी राजस्थान, असम, मेघालय ते बिहार दी केई थाहरें पर भारी थमां मती भारी बरखा दी भविक्खवाणी कीती ऐ। मौसम विभाग नै अगले चरुं दिनें तगर केरल, माहे, तमिलनाडू ते कर्नाटक दे अंदरूनी इलाकें च भारी बरखा दी चेतावनी दित्ती दी ऐ। एह्दे इलावा मैहकमे नै पच्छिम हिमालाई क्षेत्र पूर्वी ते उत्तर-पूर्वी भारत च बी बरखा बरने दी पेशगोई कीती ऐ।

<><><><><><>

India Olympics

कल होई दिएं भारी बरखें दे चलदे श्री अमरनाथ जी दी यात्रा गी बालटाल आले रस्ते थमां रोकना पेई गोआ ऐ। पहलगाम आले रस्ते पर जारी रक्ख-रखाव आले कम्में गी दिक्खदे होई उत्थें पैहले गै यात्रा बंद रखी गेदी ऐ। कश्मीर दे डिवीजनल कमीशनर बी.के.बिधूड़ी होरें आखेआ जे पहलगाम ते बालटाल दौनें रस्ते पर भारी बरखा करी मरम्मती ते रक्ख-रखाव आले कम्में दी बड़ी सख्त लोड़ ऐ। उनें दस्सेआ जे अज्ज बालटाल थमां बी यात्रा दी इजाजत नेई दित्ती जाग। 29 जून थमां शुरू होई दी इस यात्रा दरान अजे गतर 5 लक्ख शा मते श्रद्धालु शिवें दे हिमलिंगम रूपै दे दर्शन करी चुके दे न। एह सलाना यात्रा 19 अगस्त गी रक्खड़ पुन्नेआ आले दिन सम्पन्न होई जाग। तोआई 382 श्रद्धालुएं दा इक होर जत्था अज्ज श्री बुड्डा अमरनाथ जी दी यात्रा लेई रवाना होआ। इंदे च 283 मर्द, 90 महिला ते 9 बच्चे शामिल न।

<><><><><><>

Women Kabaddi

पैहली वैश्विक महिला कोड्डी लीग अगले महीने गिमां हरियाणा च शुरू होग। इसी अधिकारिक तौर पर वैश्विक प्रवासी महिला कोड्डी लीग नां दित्ता गोआ ऐ। एहूदे च 15 मुखें थमां महिला खडारी हिससा लैगन। एह आयोजन अंतराष्ट्रीय सतह पर कोड्डी गी बढ़ावा देने इसी ओलंपिक्स खेड्डें च शामिल करने ते 2036 ओलंपिक्स दी मेजबानी आस्तै भारत दी दावेदारी मजबूत करने च महत्वपूर्ण योगदान देग। विश्व कोड्डी ते हॉलिस्टिक इंटरनेशनल प्रवासी स्पोर्ट्स एसोसिएशन दी सांझेदारी च आयोजन दी शुरूआत हरियाणा च होग। इस पैहल आस्तै एसोसिएशन ते हरियाणा सरकार बशकार हाल च गै समझौता ज्ञापन पर दस्तखत कीते गे। एहूदे च इंग्लैंड, पोलैंड, अर्जेटीना, कनाडा ते इटली सनें बक्ख-बक्ख मुखें दियां टीमां प्रदर्शन करगंन। भारत 2036 ओलंपिक खेड्डे दी मेजबावनी हासल करने दा जतन करा'रदा ऐ।

<><><><><><>

NEET

राष्ट्रीय पात्रता सह प्रवेश परीक्षा नीट—पीजी 2024 मुख्य भरै दे 120 शैहरें च सफलतापूर्वक आयोजित कीती गई। राष्ट्रीय चिकित्सा विज्ञान परीक्षा बोर्ड एनबीईएमएस नै आखेआ ऐ जे इस ब'रे लगभग 2 लक्ख 28 ज्हार 540 प्रवेश पत्र जारी कीते गे। इस परीक्षा दे संचालन दी निगरानी आस्तै परीक्षा केन्द्रें पर इक ज्हार 950 थमां मते इंडीपेंडेंट appraisers ते 300 फ्लाइंग स्काड दस्ते दे सदस्य ते 8 क्षेत्रीय नियंत्रण केन्द्रें गी कायम कीते गे।

<><><><><><>